



MOHD. ROSLAN SULAIMAN (dua dari kanan) beramah mesra dengan sebahagian pelajar yang mendaftar di Universiti Putra Malaysia, Serdang. Selangor, semalam. - UTUSAN/MOHD. NAJIB MOHD. NOR

UTUSAN MALAYSIA 7/9/2017 p. 9

Atlet memanah, OKU jadi pelajar UPM

KUALA LUMPUR 6 Sept. - Seorang atlet sukan memanah berkumpulan, Nor Aliya Ghapar, 19, yang memenangi emas baru-baru ini merupakan antara 3,428 pelajar baharu yang mendaftar di Universiti Putra Malaysia (UPM) hari ini.

Dia yang melanjutkan pengajian dalam jurusan komunikasi amat gembira kerana berpeluang menjadi seorang mahasiswa dalam bidang yang diminati dan tidak sabar untuk memulakan sesi pembelajaran itu tidak lama lagi.

"Walau bagaimanapun, jadual saya mungkin agak padat selepas ini kerana saya tetap perlu menjalani latihan sebagai atlet dan dalam masa sama, mengurus diri sebagai seorang pelajar," katanya ketika ditemui dalam program pendaftaran pelajar baharu sesi akademik 2017/2018 di Kolej Canselor UPM, Serdang hari ini.

Dalam pada itu, di Kolej 15, seorang pelajar orang kurang upaya (OKU), Mior Mohd. Firdaus Mior Mohd. Fadzli, 20, menjadikan kejayaan OKU lain dalam bidang masing-masing sebagai contoh dan pembakar semangat untuk dirinya.

Dia yang mengambil jurusan

Bahasa dan Linguistik Melayu mahu mengorak langkah yang sama dan tidak meletakkan kemalangan yang pernah menimpanya empat tahun lalu sebagai pengakhiran hidup.

"Kaki kanan saya terpaksa dipotong namun dalam hidup ini, saya perlu pandang ke hadapan dan memulakan hidup yang baharu untuk mencipta kejayaan diri," katanya.

Mengulas lanjut tentang program pendaftaran pelajar baharu itu, Timbalan Naib Canselor Hal Ehwal Pelajar dan Alumni UPM, Prof. Dr. Mohd. Roslan Sulaiman berkata, pihaknya begitu teruja kerana menerima kemasukan kelompok pelajar yang cukup hebat tahun ini.

"Pendaftaran hari ini dilakukan serentak termasuk 50 pelajar yang mendaftar di kampus UPM Bintulu, Sarawak. Selain itu, tahun ini juga, UPM menerima kemasukan 272 pelajar antarabangsa.

"Dengan kehadiran pelajar baharu ini, saya berharap prestasi UPM sebagai sebuah universiti yang mengekalkan kejayaan akademik dan sahsiah dapat dikenalkan," katanya.



MIOR MOHD. FIRDAUS